



Jonas est jetté par sort en la mer pour appaiser la tempeste.

DVRANT la tempeste vn des mariniers dit à ses compagnons, Iet-tons le sort, afin que nous connoissions pourquoy ce mal cy nous est aduenü. Et ils ietterent les sorts, & le sort cheut sur Ionas. Lors ils luy dirent ; Declare-nous à quelle cause ce mal cy nous est arriué ; Quel est ton mestier ? quelle est ta terre ? Où vas-tu ? & de quel peuple es-tu ? Et il leur dit : Je suis Hebreu, & crains le Seigneur du Ciel, qui a fait la mer & la terre. Lors ces hommes eurent grande crainte, & luy dirent : Pourquoi as-tu fait cela ? Que te ferons-nous ; afin que la mer s'appaise ; car elle s'enflloit merueilleusement. Et Ionas leur dist : Prenez-moy, & me jetez en la mer, & elle s'appaisera. Je connois qu'à cause de moy cette grande tempeste est venuë sur vous Et les mariniers nauigeoient pour retourner à terre, & ne pouuoient, pour ce que la mer s'esleuoit contr'eux, & crierent ; Seigneur, nous te prions que nous ne perissions point pour l'ame de cét homme cy, & ne mets point sur nous le sang innocent. Lors ils prindrent Ionas, & le ietterent en la mer ; & elle s'arresta de son émotion, & les hommes immolerent des oblations au Seigneur, & voüerent des vœux.